

**Sud Bosne i Hercegovine**
Суд Босне и Херцеговине

Broj: S1 3 Iž 039199 20 Iž
Sarajevo, 15.12.2020. godine

Sud Bosne i Hercegovine, u apelacionom vijeću sastavljenom od sudija Zvezdane Antonović, kao predsjednika vijeća, Dr Branka Moraita i Mirsade Džindo, kao članova vijeća, odlučujući o žalbi Srpske demokratske stranke (SDS), koja osporava Odluku Centralne izborne komisije BiH o odbijanju zahtjeva za ponovno brojanje glasačkih listića za Skupštinu Grada Banja Luka, broj 05-1-07-5-1540/20 od 12.12.2020. godine, u nejavnoj sjednici, održanoj dana 15.12.2020. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum u uvodu, odbijen je kao neosnovan zahtjev političkog subjekta SDS za ponovno brojanje glasačkih listića na devet biračkih mjesta broj 034B168, 034B048, 034B033, 034B149, 034B110, 034B018, 034B191, 034B026, 034B019 za Skupštinu Grada Banja Luka.

Protiv ove odluke žalitelj SDS je izjavio žalbu zbog povrede zakona i pravila izbornog procesa, nepotpuno i nepravilno utvrđenog činjeničnog stanja i pogrešne primjene materijalnog prava. Žalbom ukazuje da je njihov zahtjev od strane CIK BiH paušalno odbijen, jer da nije odlučivala o svim navodima u zahtjevu, nije ozbiljno razmotrila zahtjev za ponovno brojanje, obrazloženje dato je nepotpuno, jer nije naveden približan broj neispravnih listića, te da konstatacija CIK BiH da povrede Zakona na koje se ukazivalo žalbom nbe utiču na dodjelu mandata je proizvoljna.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da **žalba nije osnovana**.

Centralna izborna komisija Bosne i Hercegovine, je u konkretnom slučaju, ispitala sve navode zbog podnesenog zahtjeva za ponovno brojanje i pravilno utvrdila da nisu nađene nepravilnosti koje mogu uticati na rezultate glasanja za nivo Skupštine Grada Banja Luka, koji se odnose na plasman kandidata SDS, podnosioca žalbe. Kako nalazi i ovo vijeće Suda Bosne i Hercegovine, CIK BiH je pravilno utvrdila činjenično stanje i donijela pravilan zaključak o tome da u zahtjevu za ponovno brojanje, koji je pravilno odbila, nisu navedeni opravdani razlozi za ponovno brojanje glasačkih listića u predmetnom slučaju. Žalitelj se poziva na izjave posmatrača Jorgić Slavka, i njegovu izjavu mu nije bilo dopušteno da uđe u prostor za glasanje već je morao ostati u hodniku. Nadalje, isti izjavljuje da mu je, tek dolaskom kandidata Zorana Zrnica pošlo za rukom da bude uveden u prostoriju za glasanje, gdje je primijetio razne malverzacije, nered i nepravilnosti zbog kojih je podnesena i krivična prijava, te da se drugi posmatrači dogovaraju oko dopisivanja glasova. Izjavljuje i da su pojedini kandidati na listi dobijali maksimalan broj glasova, što je, po njima, neistinito i mijenja pravu volju birača.

Prema stanju u spisu, kako je pravilno utvrdila i ocijenila CIK BiH u ožalbenoj odluci, navodi podnosioca žalbe su proizvoljni i paušalni, što proizilazi iz činjenice da u zahtjevu nije naveden približan broj glasačkih listića za koji se tvrdi da nisu ispravni, tj. suprotni odredbi člana 5.30 stav (4) tačka 3) Izbornog zakona BiH. Pored toga, u zahtjevu nije ni navedeno kako povreda Izbornog zakona utiče na rezultate izbora u smislu pravilne primjene odredbe člana 5.30 stav (4) tačka 4) Izbornog zakona BiH, niti opravdan razlog da CIK BiH, u smislu pravilne primjene odredbe člana 5.30 stav (5) i (6) Izbornog zakona BiH naredi ponovno brojanje glasačkih listića na devet biračkih mjesta u osnovnoj izornoj jedinici Banja Luka za nivo Gradske skupštine, po službenoj dužnosti. Podnosilac žalbe je imao mogućnost da svojevremeno, prema pisanim izjavama posmatrača podnosioca žalbe, u skladu sa odredbama člana 6.4. u vezi sa članom 7.4 stav (1) tačka 5) Izbornog zakona BiH, podnese prigovor gradskoj izornoj komisiji Banja Luka zbog navodnih aktivnosti kojima se ometa izborni proces.

Uvidom u rezultate glasanja u osnovnoj izornoj jedinici Banja Luka za nivo Gradske skupštine CIK BiH je, i prema stanju u spisu predmeta što potvrđuje i ovo apelaciono vijeće Suda Bosne i Hercegovine, pravilno je utvrđeno činjenično stanje prema kojem je politički subjekt, podnosilac žalbe, SDS osvojio 3.864 glasa i jedan mandat, a politički subjekt Socijalistička partija

plasirala se ispred žalioca, jer je osvojila 4.492 glasa i dobila jedan mandat u Gradskoj skupštini Grada Banja Luka, i da je razlika u broju osvojenih glasova 628 te se dato činjenično stanje ne može podvesti pod standard „povrede Zakona koja bitno utiče na izborni rezultat“ da bi CIK BiH naredio ponovno brojanje na spornim biračkim mjestima.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81 stav 1 Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

PREDSJEDNIK VIJEĆA
S U D I J A
Zvezdana Antonović